

Morning Regional Dogri News Bulletin

07 -Feb.- 2026. 09.20 Hrs

Headlines

- केन्द्री गृहमन्त्री अमित शाह अज्ज जम्मू च विकास कम्में दा जायजा लैने लेई इक उच्ची सतह दी बैठक दी प्रधानता करगंन।
- केन्द्र सरकार जम्मू-कश्मीर च रेलवे दे विस्तार च तेजी आहन्ना करदी ऐ। रेल मंत्री अश्विणी वैष्णव हो'रें आखेया ऐ जे राजौरी-पुंछ रेल लाईन सर्वेक्षण दा कम्म तेज रफ्तार कन्नै तोढ चाढेया जा'रदा ऐ
- जम्मू-कश्मीर विधानसभा च अज्जै थमां 2026-27 दे बजट पर आम चर्चा शुरु होगा।
- सेना अध्यक्ष जनरल उपेन्द्र दिवेदी हो'रें नगरौटा च व्हाइट नाइट कोर हैडक्वार्टर दा दौरा लाइयै सुरक्षा स्थिति ते फौजी कार्रवाइयें सरबन्धी तयारियें दा जायजा लैता।
- भारत नै कल इंग्लैंड गी हराइयै अंडर-19 क्रिकेट विश्व कप दा खिताब 6मीं बारी अपने नांS करी लैता ऐ।

<><><><><><>

HM -Jammu

गृहमन्त्री अमित शाह – जम्मू-कश्मीर च विकास कम्में दा आंकलन करने लेई अज्ज बडुलै जम्मू च इक उच्ची सतह दी समीक्षा बैठक दी प्रधानता करगंन। साढ़े जिला संवाददाता दी रिपोर्ट मुजब- इस बैठक दरान ढांचागत विकास आले प्रोजैक्टें- सिडकें दे विकास- केन्द्र आसेया चलाई जा'रदी योजनाएं ते पूरी-पराती प्रशासनिक प्रगति पर मुख्ब करी ध्यान दिता जाहगा। वरिष्ठ प्रशासनिक अधिकारी ते सरबन्धत विभागें दे बडु अफसर बी इस बैठक दरान मजूद रौहगंन। एहदे शा पैहले गृह मंत्री अमति शाह हो'रें कल बी इक उच्ची सतह दी सुरक्षा समीक्षा बैठक दी प्रधानता कीती ही ते कन्नै हीरानगर सैक्टर च गुरनाम ते बोबिया आली सरहदी

चौकियें दा दौरा लाया हा। उ'नें बन्ने पारा थमां घुसपैठ रोकने लेई बी.एस.एफ आसेया कीते गेदे बंदोबस्तें दा निरीक्षण कीता। इस मौके पर बोलदे होई शाह हो'रें आप्रेशन सिंदूर दौरान महत्वपूर्ण भूमिका लेई बी.एस.एफ दी सराहना कीती। उ'नें आखेया

<><><><><><>

Rajouri –Poonch Rail Line (Byte)

केन्द्र सरकार नै मती ऊंचाई आहलें- पहाड़ी ते बन्ने कन्नै लग्गदे इलाकें च बेहतर सम्पर्क-राबता जकीनी बनाने लेई रेलवे च विस्तार देने च तेजी आंदी ऐ। केन्द्र रेलवे मंत्री अश्विनी वैष्णव हो'रें कल राज्यसभा च जानकारी दिती जे जम्मू प्रांतै च प्रस्तावित राजौरी-पुंछ रेल लाइन परियोजना गी पैहल दी बिनाह पर लैंदे होई- एहदे सर्वेक्षण दा कम्म बड़ी तेजिया कन्नै जारी ऐ। उ'नें आखेया जे इस परियोजना दा मकसद बन्ने कन्नै लग्गदे इलाकें धोड़ी रेल सेवा गी सखल्ले उपलब्ध कराना ऐ। उ'नें दस्सेया जे बारामुला –श्रीनगर रेल लाइन गी बी होर बेहतर ते निगगर बनाया जा'रदा ऐ। मंत्री हो'रें दस्सेया जे मती ऊंचाई आहलें इलाकें च सकारात्मक नतीजें हासल करने लेई चेचे तौरा पर डिजाइन कीती गेदियां रेलगड्डियां आंदियां जा'करदियां ना उ'नें आखेया

<><><><><><>

Discussion –Budget (Byte)

मुख्यमंत्री उमर अब्दुल्ला हुं'दे आसेया कल विधानसभा च पेश कीते गेदे बरे 2026-27 दे बजट पर अज्जै थमां चर्चा शुरु होगा। सदन दी बैठक अज्ज बडुलै 10 बजे लग्गोघ ते सदन दी कार्रवाई दी शुरुआत सोआलें दे समें कन्नै होगा। मुख्यमंत्री उमर अब्दुल्ला हो'रें कल जम्मू दे कन्वेंशन सेंटर च इक संवाददाता सम्मेलन गी सम्बोधित करदे होई सरकार दियें मुख् प्राथमिकताएं, लोकें बक्खी केन्द्रित सुधारें ते समग्र विकास-बाढ़ें लेई सरकार दे नज़रियें पर लौऽ पाई। उ'नें आखेयाजे उंदी सरकार दा मकसद संसाधनें दा उचित ढंगै' नै इस्तेमाल करना, राजस्व गी बधाना ते नुकसान गी घट्ट करना ऐ- तां जे लोडमंदें गी मते शा मता लाह उपलब्ध करोआया जाई सकै। उ'नें आखेया

<><><><><><>

OTM Tourism

जम्मू-कश्मीर सैलसफा विभाग बी एशिया दे सब्भनें शा बड्डे सैलसफा ते यात्रा मेले चा इक आउट-बाऊंड ट्रैवल मार्ट जिसी आम तौरा पर OTM दे नां कन्नै जानेया जंदा ऐ- च हिस्सा लै'करदा ऐ। त्रंऊ दिने दा एह आयोजन जेहड़ा 5 फरवरी गी शुरु होआ हा- अज्ज सम्पन्न होआ करदा ऐ। मुम्बई दे जियो वर्ल्ड कन्वेंशन सेंटर च आयोजित OTM-2026 च जम्मू-कश्मीर दे पंडाल च खरी मती गिनतरी च लोक- निवेशक ते होर हितधारक आइयै जम्मू-कश्मीर च विरासती- साहसिक- धार्मिक- यात्राएं सरबंन्धि कुदरत दे अनुकूल ते सेहत सैलसफा दियें संभावनाएं दे बारे च जानकारी हासल करै करदे न- जेहदे'नै जम्मू-कश्मीर सैलसफा कन्नै जुड़े दे निवेशकें दी पैहली पसिंद बनदा जा'रदा ऐ।

<><><><><><>

Army Chief Visit (Byte)

सेना प्रमुख जनरल उपेन्द्र द्विवेदी हो'रें कल जम्मू-कश्मीर च सेना दी व्हाईट नाइट कोर मुख्यालय दा दौरा लाया ते खित्ते च मजूदा सुरक्षा हालात ते कारवाइयें सरबंन्धि तयारियें दी समीक्षा कीती। इस दौरान उनें'गी आतंकवाद पर रोक लाने लेई कीते गेदे बंदोबस्तें बारे तफसीली जानकारी दिती गेई- जेहेद पर उ'नें इनें तयारियें ते बक्ख-बक्ख सुरक्षाबलें बश्कार आपूं-चे दे तालमेल ते सहयोग दी सराहना कीती। दौरे दौरान सेना प्रमुख हो'रें सरबंन्धित सब्भनें धड़ें दियें कोशशें ते सहयोग दी सराहना कीती ते सतर्कता बरोबर बनाई रक्खने दी जरूरत पर जोर दिता। उ'नें कुसै बी इलाके च कारवाई दौरान आम जनता दी सुरक्षा ते हितें दा चेचा ध्यान रक्खने पर जोर भरेया। उ'नें मेद प्रगट कीती जे व्हाईट नाइट कोर दा नेतृत्व ते सैनिक इलाकें च रमानदारी ते सुरक्षा हर कीमत पर बनाई रक्खने च कामयाब रौहगंन।

<><><><><><>

Nowshera Day

भारत ते पाकिस्तान बश्कार सन 1947-1948 च होई दी जंग दरान 6 फरवरी 1948 गी हासल होई दी ऐतिहासिक जित्ते दे चेतें च कल पूरे सम्मान ते देशभक्ति दी भावना कन्नै “नौशैहरा दिवस” मनाया गया। नौशैहरा दे शेर खोआने आहले ब्रिगेडियर उस्मान हुं'दी अगुआई च बलें नौशैहरा कस्बे दा नियंत्रण फही हासल करी लैता हा ते इस चाल्ली एह जम्मू-कश्मीर दे फौजी इतिहास च इक ऐतिहासक ध्याडा बनी गया। इस सरबंध्यें च अपने बचार सांझे करदे होई इक मकामी बसनीक नै आखेया

<><><><><><>

ICC U-19 Cricket

भारत नै रिकार्ड 6मीं बारी U-19 विश्व कप दा खिताब अपने नां कीता ऐ। जिम्बाब्वे च होए दे खिताबी मुकाबले च भारत नै इंग्लैंड गी 100 रन्ज कन्नै हराया। भारतीय टीम नै पैहले बल्लेबाजी करदे होई वैभव सूर्यवंशी दे 175 रन्ज दी बदौलत तय 50एं ओवर च 411 रन्ज दा बड्डा स्कोर बनाया। परते च इंग्लैंड दी टीम 40 ओवर ते 2 गेदें च 311 रन्ज पर सिमटी गेई। इंग्लैंड दी तरफा कालेब नै सब्भनें थमां मते 115 रन्जा बनाए। एह U-19 विश्व कप फाइनल च अजें तगर दी सब्भनें थमां मते फर्क आहली जित्त बी ऐ। वैभव गी “प्लेयर ऑफ द मैच” ते “प्लेयर ऑफ द सीरिज” चुनेया गया।

<><><><><><>